

序

綱鑑精采者。浪華後藤氏
藏本也。門人藤嶋桐坪既
承其祀。將校刻布世。不幸
病沒。先是其門人土佐植

東不台
綱鑑精采

序

緬鑑精采者。浪華後藤氏
藏本也。門人藤嶋桐坪既
承其祀。將校刻布世。不幸
病沒。先是其門人土佐植

東不白
固
館

松春人來學于家塾。哀其死。將成其志。而爲事歸鄉。余姪警軒以友義代任其事。囑同社荻田雲岷書之。雲岷亦桐坪舊知之一也。

刻成。阪谷素序曰。史之有議論。猶畫之有贊。贊以發其風趣。議論以發其道理。蓋古今形勢英雄豪傑之迹。山峙水湧。雲烟闔闢。波

瀾動蕩。花木秀而雷霆震。形狀萬變。不易端倪。初學讀史。未有定見。何以能辨其津涯。於是乎取先哲議論。參看紬繹。以養其識力。

爲益洵多矣。此綱鑑補十。八史畧所以不滿大方之意。而盛行不廢也。抑圖畫有繁簡。各適其用。補畧二書。一繁一簡。不能無得失。

此書頗得其中。二書不廢焉。則此書固不可廢也。獨舶來不多。以爲憾矣。今已校刊布世。初學據此。商確是非。辨明大義。然後及諸

史。叱咤百代。網羅萬國。豈爲難哉。是蓋桐坪之遺意也。桐坪文字餘暇善丹青。嘗描春郊送別圖。自題曰。花疏柳斷意猶遠。又評溪

山三里行。此書可謂其人
去而遺意猶遠矣。又曰天
邊雲雀不知處。上下其音
春靄中。嗚呼。其人不可見。
其兒猶呱呱。代而上下者。

其數子續述之音歟。

明治二年孟夏

朗廬阪谷素撰

門人 荻田嘯謹書



刺綱鑑精義例言

一 輓近子弟之於漢土歷史以十八史畧綱鑑易知錄為必讀之書而易知錄猶繁史略太簡今此書不過於繁不失於簡寔可謂子弟讀本之佳者矣是吾輩所以有上梓之舉也

一 此書浪華止友後藤堅藏欲校點以公之世未果而歿土佐植松直久將繼其遺志又以事不果託諸余余因校完付之書肆故間或係二人之點點例不一今省賸寫之煩不盡改正之

一原本表書名不一例，每卷首題曰綱鑑論策標題，精米正宗大方，序首則曰綱鑑精米正宗，其文中則曰精米綱鑑，今從其簡雅者，定稱綱鑑精米，不敢妄改也。

一原本蓋係明時坊間梓行者，版刻麁惡，誤脫極多，今雖就諸書校讐正之，未保全無誤謬，覽者諒之。

一此書本為舉業子弟輯之，故標識中曰重某處立論，曰先貶某處，後褒某處之類居多，今皆刪之，獨存評語與問答。

一此書葉進卿所輯，閱卷可徵也，而原序係之王鳳洲輯纂，是為可疑，竊按其序文者，卑弱淺陋不足觀已，蓋原本既梓行坊間者，則書肆一時倩人偽作，否則自就他書掩襲改竄，遂致此謬而不覺焉，爾然今未可知，姑附之書尾，以待博雅之考證。

明治十年八月

阪田丈誠

泊堂由書

綱鑑精采卷之一

明

葉向高進卿輯

景

坂田丈平校

三皇五帝紀

盤古氏

太極生兩儀兩儀生四像四像變化而庶類繁
矣相傳首出御世者曰盤古氏又曰渾敦氏古盤

猶言盤固也渾敦未昭晰之謂也

天皇氏天皇氏者蓋取天開於子

之義也

一姓十三人繼盤古氏以治是曰天靈澹泊無

為而俗自化始制干支之名干幹也十干甲曰

曰柔兆丁曰疆圉戊曰著雍己曰屠維庚曰上

章辛曰重光壬曰玄默癸曰昭陽支枝也十二

支子曰困敦丑曰赤奮若寅曰攝提格卯曰單

闕辰曰執徐己曰大荒落午曰敦牂未曰協合

申曰涒灘酉曰作噩戌以定歲之所在

地皇氏地陰下凝而成質者也謂之地

一姓十一人繼天皇氏以治爰定三辰爰斯也

日月星也是分晝夜以三十日為一月

人皇氏人者神也而為萬物之最靈者也謂

之人皇氏者蓋取人生於寅之義也

一姓九人繼地皇氏以治相厥山川分為九區

人居一方故又曰居方氏當是時也萬物群生

淳風沕穆王不虛王臣不虛貴政教君臣所自

起飲食男女所自始亦號九皇氏

陳四明曰夫人靈於萬物而氣稟不齊其才

德出類者則為眾所宗此君道之始也又曰

以盤古之先為無君邪吾不得而知也慎其世而

著其號舍其怪

而存其常可也

有巢氏

太古之民穴居野處與物相友逮後物始為敵

爪牙角毒槩不足以敵禽獸有巢氏作構木為

巢說文鳥在上曰巢在穴曰窠即陳桎所謂聚薪柴以居也教民居之以避

其害教民為櫓巢夏暑居之未知稼穡種曰稼

食草木之實未有火化飲禽獸之血而茹其毛

先取其皮蔽前後取而蔽後號曰有巢氏之民

燧人氏燧音遂

自有巢氏教民巢居然猶未知熟食也有燧人

氏作觀星辰而察五行知空有火麗木則明於

是鑽木取火教民以烹飪而民利之故號燧人

氏以為燧者火之所生也乃別五木以改火順

四時而遂天之意由是火之功用洽矣皇王大紀曰燧

人氏始教民出火民未知衣服夏多積薪冬則

煬之未有烹庖飲血而茹腥始教之蟠炙後世

聖人遂有鑽燧時未有文字燧人氏始作結繩

之政索隱曰上古未有文字大事則大結其繩

亦有此立傳教之臺傳教言立師長之臺以教

為日中之市與交易之道人情以遂故又謂之

遂皇有四佐焉曰明由必育成博隕丘

太昊之母居於華胥之渚華胥地名小淵曰渚履巨人

跡意有所動虹且遠之因而始娠生帝於成

紀以木德繼天而王故風姓有聖德象日月

之明故曰太昊人生之始茹毛飲血而衣皮

革太昊始作網罟以佃以漁以贍民用故曰

伏羲氏養六畜以充庖厨且以為犧牲享神

祇故又曰庖犧氏都于宛丘

帝德合上下天應以鳥獸文章地應以河圖洛

書於是仰觀象於天俯觀法於地中觀萬物於

人始畫八卦因而重之為六十有四以通神明

之德以類萬物之情造書契以代結繩之政書

制有六一曰象形謂日月之類象曰二曰假借

謂今長之類三曰指事謂上下之類人在一上

一字兩用也四曰會意謂武信之類止戈為武五

有其處事得其宜也六曰諧聲謂考老之類建類一首文意

曰轉注謂考老之類建類一首文意六曰諧聲

謂形聲一也如江河之類皆以水為形以工可為聲也使天下義理必歸

文字天下文字必歸六書上古男女無別帝始

制嫁娶以儷皮為禮儷音麗取伉儷之義雙也正姓氏通媒

灼以重人倫之本而民始不瀆又因龍馬負圖

出于河之瑞龍馬者馬身而龍鱗以龍紀官春官為青龍氏夏官為赤

龍氏秋官為白龍氏冬官為黑龍氏中官為黃龍氏分理宇內而政化大

治作荒樂歌扶袿詠網罟以鎮天下之人命曰

立基斲桐為琴繩絲為絃絃二十有七命之曰

離徽以通神明之貺以合天人之和絙桑為三

十六絃之瑟以脩身理性反其天真而樂音自

是興焉在位一百一十五年崩

陳定字曰伏羲作八卦以通神明之德以類萬物之情因而重之為六十有四教民決嫌

疑定猶參使不迷於吉凶悔吝之塗蓋非特為萬世文字之祖實開物成務之學也造化

之秘泄於此聖道之統亦始於此矣

女媧氏與太昊同母生而神靈佐太昊卒滅共工氏

炎帝神農氏

少典之君娶于有嬌氏之女曰安登生二子

焉長曰召年育于姜水故以姜為姓以火德

代伏羲氏治天下故曰炎帝其起本於烈山

又號烈山氏亦曰連山氏其初國伊繼國耆

合而稱之故又號曰伊耆氏

古者民茹草木之實食禽獸之肉而未知稼穡
炎帝因天時相地宜斲木為耜揉木為耒始教
民藝五穀而農事興焉民有疾病未知藥石炎
帝始味草木之滋察其寒溫平熱之性辨其君
臣佐使之義作方書以療民疾而醫道立矣時
俗樸重端慙民不忿爭而財用足始列廛于國
日中為市致天下之民聚天下之貨令其交易
得所有火瑞以火紀官春官為大火夏官為鶉
火秋官為西火冬官為
北火中官
為中火在位一百四十年崩

黃帝有熊氏

有土德之瑞
故稱黃帝

姓公孫諱軒轅有熊國君之子帝生而神靈
弱而能言幼而徇齊長而敦敏成而聰明長
于姬水故又以姬為姓是時神農氏世衰諸
侯相侵伐炎帝榆罔弗能征軒轅脩德治民
以征不享禽殺蚩尤於涿鹿於是諸侯咸推
軒轅代神農氏為天子

黃帝既為天子以雲紀官

春官為青雲夏官為
紅雲秋官為白雲冬

官為黑雲中
官為黃雲

舉風后力牧太山稽常先大鴻得

六相而天地治神明至

張九韶曰黃帝得風后明天道太常察地理蒼

龍辨東方祝融辨南方大

封辨西方后土辨北方由是民不習偽官不

懷私人無天枉物無疵癘虎豹不妄噬鸞鳥不

妄搏裔夷之人罔不來享有草生於庭倭人入

則指之名曰屈軼鳳凰巢于阿閣麒麟遊于苑

園焉在位百年年百十有一歲

少昊金天氏

名摯姓己黃帝之子女囂也母曰嫫祖感大

星如虹下臨華渚之祥而生帝以金德王天

下遂號金天氏能脩太昊之法故曰少昊都

曲阜

元年少昊立鳳鳥通至以鳥紀官

鳳鳥氏歷正也玄鳥氏司

分者也青鳥氏司啓者也丹鳥氏司閉者也祝

鳩氏司徒衍也睢鳩氏司馬也鳴鳩氏司空也

爽鳩氏司寇也鵙時諸福之物畢至帝作大淵

之樂以諧人神和上下及其衰也九黎亂德天

下之人相懼以神相惑以怪家為巫史民瀆于

祀災禍荐至帝在位八十四年壽一百歲

姬姓祖曰黃帝、父曰昌意、昌意娶蜀山氏之女、曰女樞、感瑤光貫月之祥、生帝于若水、以水德、紹金天氏而王、初國高陽、故號高陽氏、都帝丘。

帝靜深、以有謀、疏通而知事、養材以任地、載時以象天、依鬼神以制義、治氣以教化、潔誠以祭祀、命南正重司天、以屬神、化正黎司地、以屬民、革九黎之亂、神人不雜、萬物有序、民安其生焉、帝作曆、以孟春之月為元、是歲正月朔且立春。

五星會于天、歷營室、故顓帝為曆宗也、又作承雲之樂、在位七十八年、年九十一歲。

帝嚳高辛氏 嚳音告

名彘、姓姬、少昊之孫、嶠極之子、生而神靈、年十五、佐顓帝、受封于辛、年三十、以木德代高陽氏、為天子、以其肇基于辛、故曰高辛氏、都于亳。

元年、命咸黑作九招之樂、帝普施利物、不私其身、聰以知遠、明以察微、順天之義、節地之財、仁

而威惠而信脩身而天下服其色郁郁其德嶷

嶷史記索隱曰郁郁猶穆穆也嶷嶷德高也執中而徧天下故日月

所照風雨所至莫不服從帝四妃元妃有郃氏

女曰姜嫄與帝禋祀上帝而生稷陳鋒氏女曰

慶都有赤龍之祥孕十四月而生堯有娥氏女

曰簡狄祈于高禖有飛燕之祥而生契媯訾氏

女曰常儀生子摯帝在位七十年年一百五歲

子摯嗣立荒淫無度不脩善政諸侯廢之而尊堯為天子

胡五峰曰天地之間有氣化有形化人之生雖以形相禪固天地之精也姜嫄克禋克祀

以弗無子志之所至氣亦至焉氣之所至精亦至焉故若履天帝之武而敏歆其祀於是

有子不可以謂怪至於讖諱之書謂慶都感赤龍之精而生堯簡狄吞玄鳥之卵而生契

則誣矣何者人也乃與繁氣交而生子則無是理也西漢薄太后有蒼龍據腹之祥而生

文帝若非史氏記之詳明則後世必謂薄與龍交而生子矣是故儒者莫要於窮理明

然後物格而知至知至然後意誠而心不亂矣

帝堯陶唐氏

帝嚳之子摯之弟摯立封堯為唐侯摯荒淫

無度諸侯廢之尊堯為天子以火德王都平

陽

元載甲辰帝其仁如天其智如神就之如日望之如雲富而不驕貴而不舒茅茨不剪素題不栉大路不畫太羹不和衣履不敝盡不更為存心於天下加志於窮民一民饑曰我饑之也一民寒曰我寒之也一民有罪曰我陷之也仁昭而義立德溥而化廣故不賞而民勸不罰而民治○帝治天下五十載不知天下治與不治問左右外朝在野不知乃微服遊於康衢聞童謠曰

三立我烝民莫非爾極不識不知順帝之則又有老人含哺鼓腹擊壤而歌曰日出而作日入而息鑿井而飲耕田而食帝力何有於我哉○堯又觀華封華封人祝曰使聖人富壽多男子堯曰辭多男子則多懼富多事壽多辱封人曰天生萬民必授之職多男子而授之職何懼之有富而使人分之何事之有天下有道與物皆昌天下無道脩德就閑何辱之有○是時洪水為災群臣舉鯀治之鯀方命圯族方逆圯族類也九載

績用弗成。○堯作樂名曰大章。在位七十二年。壽一百一十八歲。

胡雙湖曰書稱帝德曰欽明文思安安者帝之心法也曰允恭克讓者帝之身法也欽有于中恭見于外敬為聖學始終之要也克明峻德以親九族則身脩而家齊矣九族既睦平章百姓則家齊而國治矣百姓昭明協和萬邦則國治而天下平矣聖經明德二字實自堯發之大學八條目亦始於此不但是也舉天下以與人大事也而授受之際不過曰允執厥中聖經中之為義亦自堯發之中庸九經亦始於此然則開千萬世聖學之源者堯之功顧不鉅乎

帝舜有虞氏

姓姚氏黃帝八代孫也黃帝生昌意昌意生顓頊顓頊生窮蟬窮蟬生敬康敬康生句芒句芒生嶠牛嶠牛生瞽瞍瞽瞍生舜瞽瞍惑於後娶并少子嘗欲殺舜舜盡孝悌之道烝烝又不格姦舜耕於歷山人皆讓畔漁於雷澤人皆讓居陶於河濱器不苦窳所居成聚二年成邑三年成都堯之子丹朱不肖求可_三以代已位者四岳群臣皆舉舜堯乃召舜歷試諸艱使之慎徽五典五典克從納于百揆

此見一時人才之盛非後世所能及堯不舉而舜舉之是以天下人才付之於舜即堯不得舜為已憂意

百揆時叙賓于四門四門穆穆納于大麓烈

風雷雨弗迷堯於是使舜攝位是時尚陽氏

有才子八人曰蒼舒璜戩檮戡大臨天下謂

之八愷愷和也高辛氏有才子八人曰伯奮仲

仲伯虎仲熊叔豹季狸天下謂之八元元善也世濟其美

堯未及舉舜乃舉八愷使主后土舉八元使

布五教於四方又帝鴻氏有不才子號曰渾

沌即驩也少昊氏有不才子號曰窮奇即共顓

頊有不才子號曰檮杌即縉雲氏有不才子

號曰饕餮即三苗謂之四凶堯未能去舜皆投

之四裔放驩堯於崇山流共工於幽州堯崩

舜即天子位號曰有虞氏以土德王都蒲阪

元載丙辰帝命禹為司空宅百揆棄為后稷教稼契

為司徒敷五教皋陶為士明五刑垂為共工理百工益

為虞治山澤伯夷為秩宗典禮夔典樂龍作納言是

所謂九官也帝廣開視聽求賢人以自輔立誹

謗之木恭已無為彈五絃之琴歌南風之詩曰

南風之薰兮可以解吾民之愠兮南風之時兮

可以阜吾民之財兮，舜以樂教天下，重黎舉夔，舜以為樂正，重黎欲益求人，舜曰：樂天下之精，得失之節，夔能和之以平天下，一而足矣。夔脩九招六列六英，以明帝德，正六律和五聲，以通八風，而天下大服。是時景星出，慶雲興，帝南巡狩，崩于蒼梧之野，在位六十一年，壽一百有十歲。

胡五峰曰：皇者初冒天下者也，帝者主宰天下者也，自燧人氏而上，即三皇之世也。庖犧神農黃帝堯舜五君者，有先天地開闢之仁，後天地制作之義，民到于今，受其賜，故孔子稱之黃帝之後，少昊顓頊高辛，雖稱帝，天下孔子所以越而遺之，必稱堯舜者，以三君居位，僅可持其世而已，未嘗有制作貽萬世故也。然則五帝之名實定矣。

夏紀

大禹

姓姒氏，黃帝玄孫，鯀之子也。鯀治水無功，殛於殛，舜攝位，舉禹使續父業，禹傷父功不成而受誅，乃勞心焦思，居外十三年，過家之門不入，陸行乘車，水行乘船，泥行乘橈，山行乘櫜，以開九州。

九州謂揚荊豫青兗雍幽冀并等州是也。

澤度九山，於是水害皆息。九州攸同，四隩可居。禹為人敏給克勤，其德不遠，其仁可親。其言可信，聲為律，身為度，左準繩，右規矩。舜既即位，乃使禹為司空，以宅百揆。舜之子商均不肖，乃薦禹於天。使代已位，舜崩，禹即天子位，以金德王，都安邑，國號夏。

元年，丁禹既即位，仍有虞，以建寅月為歲首，色尚黑，牲用玄，以黑為徽號，作樂曰大夏，夏大也。言能大堯舜之德也。懸鐘鼓，罄鐸鞀，以待四方。

聖人切切以求天下之言，則其心之不自聖可知。

之士曰：教寡人以道者，擊鼓；諭以義者，擊鐘；告以事者，振鐸；語以憂者，擊磬；有獄訟者，搖鞀。一饋而十起，一沐三握髮，以勞天下之民。○出見罪人，下車問而泣之。左右曰：罪人不順道，君王何為痛之？禹曰：堯舜之人，皆以堯舜之心為心，寡人為君，百姓各自以其心為心，是以痛之。古有醴酪，禹時儀狄作酒，禹飲而甘之，遂疏儀狄。絕旨酒，曰：後世必有以酒亡國者。禹南巡狩，會諸侯於塗山，執玉帛者萬國，禹濟江，黃龍負舟。

舟中人懼禹仰天嘆曰吾受命於天竭力以勞
 萬民生寄也死歸也余何憂於龍焉視龍猶蠖
 蟻顏色不變須臾龍俛首低尾而逝禹致群臣
 於會稽防風氏後至禹戮之。舜初分天下為
 十二州禹復為九州乃鑄九鼎以象九州左傳云禹
 鑄鼎圖象百物而為之在位二十七年壽一百歲
 禹崩子啓立

胡五峯曰左氏以為禹者圖象百物而為之
 備使民知神姦者愚竊以為為誣矣魅魅魍魎
 自古不以為天下患惟鄙夫鄙婦則或言之
 縉紳先生不道也王者協乎上下以承天休

乃以此為事而庸鑄之於鼎乎然則禹所鑄
 者何也始除洪水之害別九州之分野差土
 田之高下定貢賦之式度立井田封建之經
 界畫一時生養斯民之道矣又鑄于鼎以為
 萬世準耳春秋之時晉鄭鑄刑書則知
 古人創立制度欲傳久遠者必於鼎矣
 帝啓禹之子也禹嘗薦益於天禹崩益避啓於
 箕山下諸侯朝覲及謳歌獄訟不之益
 而之啓啓乃即
 在位九年

元歲甲申啓即位乃即鈞臺以享諸侯時有扈氏
 無道威侮五行怠棄三正啓召六卿以征之大
 戰於甘滅之啓在位九年崩子太康立

胡雙湖曰帝啓嗣位之初何為遽有有扈氏
 之變也唐孔氏謂堯舜受禪啓獨繼父以是

不服吁傳子固非禹之本心也天與人歸啓不能逃其責矣然天下之事纔出於創見者不能不起人疑叛之心至重煩王師大戰而後滅之舜禹嗣位寧有是乎夫子定書而存此篇固見啓之發奮有為且著有扈氏不臣之罪而帝王升降之幾世變之一會從可識矣

太康 啓之子也在位二十九年

元歲 癸巳太康即位荒逸弗恤國事畋獵於洛水之表十旬弗歸有窮后羿因民之怨距之於河太康不得歸后羿乃立太康之弟仲康

胡雙湖曰禹之訓曰內作色荒外作禽荒甘酒嗜音峻宇彫牆有一於此未或不亾太康

一犯禽荒之戒而竟以失邦皇祖之訓豈欺我哉

仲康 太康之弟在位十三年

元歲 壬戌仲康即位羿為之相仲康首命胤侯掌

六師惟時羲和沉亂于酒遐棄厥司王命胤侯

往征之仲康崩子相立

林之奇曰仲康即位之始即命胤侯掌六師以收羿之兵權羲和之罪雖曰沉亂于酒然黨惡於羿同惡相濟故胤侯承王命往征之以剪羿羽翼是故終仲康之世羿不得以逞也

帝相 仲康之子在位二十七年

元歲巳帝相既立時權歸后羿相為羿所逐居
商丘依同姓諸侯斟灌斟鄩氏○有窮后羿因
夏民以代夏政恃其善射不脩民事淫于原獸
而用寒泥泥行媚于內施賂于外娛羿于畋外
內咸服乃殺羿自立泥因羿室生澆及豷澆長
泥使澆滅斟灌斟鄩氏殺帝相相后緡有仍國
君之女方娠奔歸有仍生少康

少康帝相之子在位二十二年

少康既長為仍牧正澆使椒求之奔有虞為

之庖正虞君思妻之二姚而邑諸綸有田一

成十有衆一旅五百人也能布其德以兆其謀以

收夏衆而撫其官職夏有舊臣靡名臣自有鬲

氏收二國之燼二國之燼謂斟灌斟鄩之遺民舉兵滅泥而

立少康焉

元歲壬午少康即位夏道復興少康崩子杼立

胡雙湖曰少康崎嶇亂離之間復禹跡還舊都祀夏配天不失舊物而有夏中興焉後之言中興者當自少康始少康其中興之賢君靡其中興之賢臣乎

帝杼少康之子在位十七年崩子槐立

帝槐 行之子在位二十六年崩子芒立

帝芒 槐之子在位十八年崩子泄立

帝泄 芒之子在位十六年崩子不降立

帝不降 泄之子在位五十九年崩弟局立

帝局 不降之弟在位二十一年崩子厘立

帝厘 局之子在位二十一年崩帝不降之子孔甲立

帝孔甲 不降之子在位三十一年

元歲 壬寅 孔甲好鬼神之事不務脩德諸侯多叛時

天降二龍有雌雄陶唐氏之後有劉累者學擾龍

于豢龍氏也 擾馴也 事孔甲能飲食之夏后嘉之賜氏

曰御龍後龍一雌死潛醢以食夏后既而使求之

累懼而遷于魯縣孔甲崩子臯立

帝臯 孔甲之子在位十一年崩子發立

帝發 臯之子在位十三年崩子履癸立

履癸 發之子是為桀也在位五十二年

元歲 癸卯 自孔甲以來諸侯多叛桀尤為無道天

下顛怨而患之桀有力能申鐵鉤索伐有施氏

有施氏以妹喜女焉妹喜有寵所言皆從為瓊

宮瑤臺肉山脯林酒池可以運船糟隄可以望
十里一鼓而牛飲者三千人妹喜笑以為樂殷
湯伐之放于南巢而死

右夏十七王起禹丁巳止桀甲午計四百

五十八年

商紀

湯初號商後
盤庚改殷

成湯

黃帝之後也姓子氏初帝嚳次妃簡狄祈于高
禖有玄鳥之祥遂生契契事唐虞為司徒教民

有功封于商傳十三世生天乙是為成湯是時

伊尹耕于有莘之野湯使人以幣聘之進之于

桀桀不能用伊尹復歸湯桀殺直臣龍逢眾庶

莫敢直言湯使人哭之桀怒囚湯于夏臺

夏臺
獄名

已而得釋湯出見人張網四面而祝之曰從天

墜者從地出者從四方來者皆罹吾網湯解其

三面止置一面更祝曰欲左者左欲右者右欲

高者高欲下者下不用命者乃入吾網漢南諸

侯聞之曰湯德至矣及禽獸歸之者四十餘國

桀無道暴戾殘虐萬姓伊尹相湯伐桀放桀于南巢諸侯大會湯退而就諸侯之位諸侯皆推湯為天子於是湯乃即位都于亳

元祀未湯既即位及桀之事以寬治民除其邪虐順民所喜遠近歸之乃改正朔以建丑之月為正月色尚白牲用白以白為徽號○大旱七年太史占之曰當以人禱湯曰吾所為請雨者民也若以人禱吾請自當遂齊戒剪髮斷爪素車白馬身嬰白茅以為犧牲禱于桑林之野以

六事自責曰政不節歟民失職歟官室崇歟女謁盛歟苞苴行歟讒夫昌歟言未已大雨方數千里○又以莊山之金鑄幣救民之命作樂曰

大濩濩護也言湯之寬仁救護生民也在位十三年壽一百歲

湯崩孫太甲立

丁南湖曰天之愛人也而謂其當以人禱是誣天也湯之檢身也而謂其以身為犧是誣湯也唐馬總作通曆凡書上古之事詭誕不經蓋如此

胡雙湖曰唐虞之時泰和之景象也禹啓之世亨通之嘉會也夏商之末造其天時肅殺之秋乎湯武適當其時革命之舉不容不順乎天而應乎人矣是故天之道生於春長於

夏肅殺於秋謂肅殺非天之道不可也聖人之道揖遜於唐虞家傳於夏禹放伐於商周謂放伐非聖人之道亦不可也聖人初何嘗容心於其間哉與時偕行而已布昭聖武之湯即克寬克仁之主我武推揚之武即作民父母之元后曾謂湯武果何異於堯舜禹之道哉觀四時則知天矣觀天則知聖人矣

太甲

湯之嫡孫太丁之子在位二十三年

元祀

戊申

太甲不明厥德顛覆湯之典刑伊尹放

之於桐宮

湯墓所在

乃自攝政當國以朝諸侯太甲

居桐三年自怨自艾處仁遷義伊尹乃奉太甲

復歸于亳太甲增修厥德諸侯咸歸號為太宗

太甲崩子沃丁立

沃丁

太甲之子在位二十九年

元祀

辛巳

沃丁嗣位委任賢臣咎單一順伊

尹所行之事沃丁崩弟太庚立

太庚

沃丁之弟在位二十五年崩子小甲立

小甲

太庚之子在位十七年崩弟雍已立

雍已

小甲之弟在位十二年

元祀

壬辰

時商道寢衰諸侯或不至雍已崩弟太

戊立

太戊 雍已之弟在位七十五年

元祀 甲辰 亳有祥桑穀共生于朝一日暮大拱 兩手握之

曰 太戊問於伊陟陟曰妖不勝德君之政其有

關歟太戊於是脩先王之政明養老之禮早朝

晏退問疾弔喪三日而祥桑枯死三年遠方重

譯而至者七十六國 重復也傳四夷之言者曰譯譯繹也 有賢臣

巫咸臣扈等共輔佐之商道復興號稱中宗太

戊崩子仲丁立

仲丁 太戊之子在位十三年

元祀 己未 時亳都有河決之害乃遷都於囂仲丁

崩弟外壬立

外壬 仲丁之弟在位十五年崩弟河亶甲立

河亶甲 外壬之弟在位九年

元祀 丁亥 時囂都有河決之害遷都于相河亶甲

崩子祖乙立

祖乙 河亶甲之子在位十九年

元祀 丙申 時相都有河決之害乃遷都于耿祖乙

崩子祖辛立

因天譴而為邪正相勝之論因勸其君以修政此伊陟善于引君也

祖辛 祖乙之子在位十六年崩弟沃甲立

沃甲 祖辛之子在位二十五年崩祖辛之子祖丁立

祖丁 祖辛之子在位三十一年崩沃甲之子南庚立

南庚 沃甲之子在位二十五年崩祖丁之子陽甲立

陽甲 祖丁之子在位七年崩弟盤庚立

盤庚 陽甲之弟在位一十八年

元祀 庚子時商道寢衰耿都又有河決之害臣民

安土重遷盤庚作書以告諭臣民復遷都于亳

從湯所都改商曰殷盤庚行湯之政商道復興

盤庚崩弟小辛立

小辛 盤庚之弟在位二十一年崩弟小乙立

小乙 小辛之弟在位二十八年崩子武丁立

武丁 小乙之子在位五十九年

元祀 丁巳武丁立恭默思道夢上帝賚以良弼乃

使人以形旁求於天下得傳說於版築之間命

以為相進諫論列天下之事君臣道合政事脩

舉○武丁祭成湯有飛雉升鼎耳而雊也祖已

訓諸王武丁內反諸已以思王道三年蠻夷編

君臣相合于夢寐之間亦一念精誠所感與文王卜獵而得太公同意

髮重譯來朝者六國時鬼方無道武丁伐之三年乃克殷道復興號稱高宗武丁崩子祖庚立

祖庚高宗之子在位七年崩弟祖甲立

祖甲祖庚之弟在位二十三年崩子廩辛立

廩辛祖甲之子在位六年崩弟庚丁立

庚丁祖甲次子在位二十一年崩子武乙立

武乙庚丁之子在位四年

元祀癸亳都河決遷都于河北武乙無道為偶人謂之天神與博不勝而戮之為革囊盛血仰

射之謂之射天獵於河渭之間暴雷震死武乙

崩子太丁立

太丁武乙之子在位三年崩子帝乙立

帝乙太丁之子在位三十年

元祀庚帝乙有三子長曰微子啓次日仲衍季曰受辛受辛即紂也紂之母為后賢紂尚少帝乙及后欲立啓為太子太史據法爭之曰有妻之子不可立妾之子乃立紂帝乙崩子紂立紂帝乙之子在位三十二年

元祀丁未紂資辯捷疾聞見甚敏材力過人手格
猛獸智足以拒諫言足以飾非以爲天下皆出
已之下始爲象箸箕子嘆曰彼爲象箸必爲玉
杯而遠方珍怪之物輿馬宮室之漸自此始矣
伐有蘇氏有蘇氏以妲己女焉妲己有寵惟言
是從作奇技淫巧以悅之造鹿臺爲瓊室玉門
厚賦斂以實鹿臺之財盈鉅橋之粟狗馬奇物
充牣其中以酒爲池懸肉爲林男女裸相逐於
其間宮中九市爲長夜之飲百姓怨望諸侯有

叛者妲己以爲罰輕誅薄故威不立乃重爲刑
辟爲馱斗以火燒熱使人舉之手爛更爲銅柱
以膏塗之加於炭火之上使有罪緣之紂與妲
己以爲大樂名曰炮烙之刑。紂以周侯昌文王
也及九侯鄂侯爲三公九侯進女於紂女不喜
淫紂殺之而醢九侯鄂侯諍之併殺昌聞之嘆
息崇侯虎以告紂紂乃囚昌於羑里昌曰吾唯
明天人之道以順受之耳因演易卦昌之臣散
互生閔天之徒患之乃求有莘氏之美女及珍

寶、因廢臣費仲而獻紂、紂大悅曰、此一物足以釋西伯、乃釋昌、昌出而獻洛西之地、以請除炮烙之刑、紂許之、更賜昌得專征伐、為西伯、昌退而修德、諸侯多叛紂而歸昌、昌卒、其子發嗣為西伯、諸侯叛殷歸周者八百。○紂愈淫亂不止、比干曰、主暴不諫、非忠也、畏死不言、非勇也、見過即諫、不用即死、忠之至也、君有過而不以死爭、則百姓何辜、乃陳先王艱難、天命不易、國家將亾之明徵、請王洗心易行、伏于象魏之門、紂

大怒曰、比干自以為聖人矣、吾聞聖人之心有七竅、信有諸乎、乃遂殺王子比干、剗視其心。○紂淫泆益肆、箕子諫、不聽、人或曰、可以去矣、箕子曰、知不用而言、愚也、殺身以彰君之惡、而自說於民、吾不忍為也、二者不可、然且為之、不祥莫大焉、乃解衣被髮、佯狂而去之、遂隱而鼓琴、以自悲、故傳之曰箕子操。○三十有三祀、西伯發舉兵伐紂、紂與戰不勝、乃衣寶玉自焚而死、殷亾。○箕子過故殷墟、傷官室毀壞、生禾黍、乃

作麥秀之歌曰麥秀漸漸兮禾黍油油兮彼狡童兮不與我好兮殷民聞之皆流涕

胡五峰曰堯舜與賢三王與嫡亦以聖人不世出賢德無以大相過即定於與嫡所以一民心重天下也然大君人命所繫與嫡之本聖人有權焉未嘗執一也是以武王雖弟上承文王之命而終不失為君帝乙亦賢君也泥於立嫡而不知紂之足以亾天下也亦不知變之過矣

熊勿軒曰天下之治亂繫風俗風俗之美惡繫人心三代固有道之長也而商之一代風俗為最美每讀商書至終篇紂之亾三仁寧必寧遜寧佯狂為奴所以自靖自獻者不敢有一毫負先王之心伯夷即馬一諫凜凜乎萬世君臣之大義雖聖人復起不可易也當

時為商之臣若民者大率有不肯臣周之心大誥洛誥多方多士諸篇班班可觀雖周人目之為頑在商則不失為義亦可見商家一代之人心風俗矣夏未之前聞也周平王以後奄奄如一疋羸病廢之人畧無能出一心強劑以起其生者則所謂養成一代之人心風俗有王者作誠不可已也

右商二十八君按經世書自湯起乙未

止紂戊寅計六百四十四年

周紀

武王 武王名發在位七年

其先祖后稷名棄其母有邠氏女曰姜嫄為

帝嚳元妃出野見巨人跡說而踐之而身動如孕者居期而生子以為不祥棄之因名曰棄棄為兒時好種樹麻菽及為成人遂好耕農堯舉為農師有功封於邵號曰后稷別姓姬氏傳五世曰公劉復修后稷之業遷於邠今邠州百姓懷之多徙而保焉周道之興實自此始又傳九世曰古公亶父大王也復脩后稷公劉之業積德行義國人皆戴之避狄遷岐邠人扶老攜弱盡歸焉古公有長子曰泰伯

次曰虞仲其妃太姜生少子季歷娶太任生子昌有聖瑞泰伯虞仲知古公欲立季歷以傳昌二人乃亾如荊蠻楚越間以讓季歷古公卒季歷立是為王季脩古公遺道篤於仁義諸侯順之王季卒子昌立是為西伯治岐有德政嘗為池沼見死人之骨命吏瘞之吏曰此無主矣西伯曰有天下者天下之主有一國者一國之主寡人固其主矣以棺衾更葬之天下聞之曰西伯澤及枯骨況於人乎虞

芮之人虞芮二國名有獄不能決乃如周入界見

耕者皆讓畔民俗皆讓長慙相謂曰吾所爭

周人所耻何往為遂還俱讓其田而不取漢

南諸侯歸者四十國西伯崩子發立是為武

王

武王既立以太公望為師周公旦為輔召公奭

畢公高皆姬姓也之徒皆左右武王率脩文王緒業

時商紂無道武王東觀兵至于盟津渡名渡河東

流白魚躍入王舟中魚者介鱗之物兵象也白者殷家正色殷命歸周之

兆武王俯取以祭既渡有火自上復于下至于

王屋王所居屋流為鳥其色赤其聲魄流行也鳥有孝德武王承

父志業故致此瑞赤者周之正色魄安定之意是時諸侯不期而會者

八百陳師牧野伯夷叔齊扣馬諫曰父死不葬

爰及干戈可謂孝乎以臣殺君可謂仁乎左右

欲殺之太公曰義人也扶而去之及武王定天

下天下宗周伯夷叔齊耻之不食周粟隱於首

陽山作歌曰登彼西山兮采其薇矣以暴易暴

兮不知其非矣神農虞夏忽焉沒兮我安適歸

問夷齊諫武王曰父死不葬爰及干戈泰誓曰惟十有三年大會于孟津信史則聖人未嘗有十三年不葬親之理信書則夷齊義士必不虛言以誣武王抑尚有別說乎

矣吁嗟徂兮命之衰矣遂餓而死

劉道源曰易稱湯武革命應乎天而順乎人孔子曰伯夷叔齊求仁而得仁又誰怨二者意殊志戾蓋言湯武所以懼後世之為人君者稱夷齊所以戒後世之為人臣者道悖而

同歸雖萬世無弊焉

元年己王踐位諸侯受命于周乃縱馬于華山之陽放牛于桃林之野偃干戈振兵釋旅釁鼓旗甲兵藏之府庫以示天下不復用始改正朔以建子為正月色尚青服以冕都于鎬乃祀于周廟追王太王王季文王因定謚法柴望大告

三年矣然則夷齊仁人義士雖不虛言以誣武王但史乃記事之書未可盡信如公羊穀梁以尹氏卒為正卿左氏以尹氏卒為隱母二為男子一為婦人或謂女媧補天或謂屈軼生庭記事之書可盡信乎

武成。武王既克商，反紂之政，乃使其弟管叔、鮮、蔡、叔度、監、紂之子武庚治殷，命釋箕子之囚，表商容之間，散鹿臺之財，發鉅橋之粟，封比干之墓，追王先世祖考，褒封神農黃帝堯舜禹之後，功臣謀士皆以次錫封，封兄弟之國十五人，姬姓之國四十人，間箕子以天道作洪範，封箕子於朝鮮而不臣也。二年，王有疾，周公為壇告太王、王季、文王，請代武王之死，周公乃以下書藏於金縢櫃中。

史記周武王有疾，周公請命，三王欲以身代，公錄其策。

藏之於櫃，藏之以金，故曰金。王疾瘵，出書金滕。○王作

樂曰大武，言伐紂除害。○七年王崩，壽九十三。

太子誦立

胡雙湖曰：武王之為君也，大之為洪範之陳，而萬世彝倫之道明次之為丹書之戒而敬，怠義欲之辨著緘之為九府圜法之立而泉貨之利通報本反始則崇追王祭祀之禮垂裕後昆則立教世子之法至于建官則唯賢也位事則惟能也重民五教而食喪祭之加謹，惇信明義而崇德報功之兼盡此其所以垂拱而天下治也。

成王名誦武王之子，年十三嗣位在位二

元年，丙戌周公居冢宰，以王年幼恐天下叛，乃攝

政代王當國。成王將冠，周公命史雍頌曰：近于

民遠於佞，近於義，齋於時，任賢使能，朝於祖以

見諸侯。管叔、蔡叔、霍叔皆文王子流言曰：「流言謂言如水之流

無實，誘毀公將不利於孺子，孺子指成王而言也。」既而與武庚

同反，周公乃作大誥，大誥詳見周書，奉王命以討武庚。

管叔誅之，放蔡叔於郭鄰，降霍叔為庶人，遂定

奄，奄君武庚之黨。及淮夷，東土以寧。方流言之初，成王

亦疑周公及開金滕，見請代武王之事，乃感泣

迎周公歸，既誅武庚，乃封微子以代殷侯，國號

宋宋古商丘之地名周封微子於此用殷之禮

樂於周為客而不臣。○五年王與其弟叔虞削

桐葉為珪戲曰吾以此封若史佚命擇曰王曰

吾與之戲爾史佚曰天子無戲言言則史書之

禮成之樂歌之遂封叔虞於堯之故墟曰唐侯

○六年周公朝諸侯於明堂制禮作樂頒度量

而天下大服樂曰勺言能勺先王之道也。○交

趾南有越裳氏重三譯來獻白雉曰道路悠遠

恐一使不通故重譯來朝周公曰德澤不加君

子不饗其贄政令不施君子不臣其人譯曰吾

受命吾國之黃者曰天無烈風淫雨海不揚波

三年矣意者中國有聖人乎蓋往朝之周公歸

之於王使者還迷其歸路周公錫以指南車常

為先導示有以服遠人而正四方。○七年初武

王以洛為天下之中四方朝貢道均將營宅於

洛而未果至是成王命周公召公營之以成武

王之志謂之東都定鼎於郊廓卜曰傳世三十

歷年八百。○十二月周公歸政於成王。○魯公

伯禽周公元子也成王少周公留相之使其子就封於魯周公謂伯禽之傅曰汝將行盍志而子美德乎對曰其為人也寬好自用以慎此三者其美德也已周公曰以人惡為美德乎君子好以道德故其民歸彼其寬也由無辨矣汝又美之彼其好自用也是所以窶小也汝又美之彼其慎也是其所以淺也汝又美之吾語汝我文王之子武王之弟今王之叔父吾於天下不賤矣然我一沐三握髮一飯三吐哺起而待士

天下之士至者無慮千人於是吾得三士焉以正吾身以定天下夫吾得三士於百八千人中若是乎其難也子之魯慎無以國驕人。太公封於齊五月而報政猶述職也周公曰何族也音族速曰吾簡其君臣禮從其俗伯禽至魯三年而報政周公曰何遲也曰變其俗變其鄉俗革其禮除其舊禮喪三年而後除之周公曰後世其北面事齊乎夫政不簡不易民不能近平易近民民必歸之周公問太公何以治齊曰尊賢而尚功尊尚有功

之周公曰後世必有篡弑之臣太公問周公何以治魯曰尊賢而親親尊其賢親其親太公曰後寢弱矣○初虞夏商之世幣金有三品至是太公望乃立九府圜法九府謂大府王府內府外府泉府天府職內職金職幣圜謂均而通也○王嘗問於史佚曰何德而民親其上對曰使之以時而敬順之忠而愛之布令信而不食言如臨深淵如履薄冰王曰懼哉對曰四海之內善則臣不善則讐也夏殷之民讐桀紂而臣湯武若之何其不懼王崩子釗立

胡雙湖曰今讀周官之書則知成王設官分職之有倫朝覲巡狩之有法讀君陳之書則知成王命君陳以尹茲東郊拳拳不忘殷民之化至於作德日以休敬典在德兩言則又二篇中切要之論此固成王學力之到而實周公造就之妙歟

康王名釗成王之子在位二十六年

元年癸亥王卽位諸侯來朝王作康誥以告之○

十二月命畢公保釐成周保安之也釐理之也○初召公

治西方甚得民和有司請召民召公曰不勞一身而勞百姓非吾先君文王之志也乃巡行鄉邑聽斷於隴陌阡畝之間廬於棠樹之下當蠶

桑耕種之時乃弛獄出居民使得反業至是召
公卒人思其政懷棠樹不忍伐作甘棠之詩歌
詠之成康之際天下太平刑措四十餘年不用
王崩子瑕立

胡雙湖曰康王克遵洪業敬恭神人四夷賓服海內晏然百姓興於禮義囹圄空虛成康之際天下安寧而有唐虞之風焉吁文武成康父子祖孫聖賢相繼者二百餘年後世謂泰和在唐虞成周宇宙間貞元會合之運亘千古而再見者歟

昭王

名瑕康王之子在位五十年

元年己丑周道漸衰王巡狩返濟漢漢濱人以膠

膠船王至中流膠液王及祭公皆溺於子滿立

穆王

名滿昭王之子在位五十五年按謚法布德執義曰穆

元年

庚辰王將征犬戎即昆夷也祭公謀父諫曰先王

耀德不觀兵無勤民於遠王不聽竟征之得四

白狼四白鹿以歸自是荒服不至王命呂侯作

祥刑之書告四方○王崩子繫扈立

胡五峯曰穆王德雖下衰然能曲盡典獄之情偽以訓戒天下後世其仁民之意厚矣孔子所以有取也亦不得中行而與之故思狂狷之意歟

共王

名繫扈穆王之子在位十一年按謚法既過能改曰共

元年乙未王遊於涇上胡水名密康公從康公密國之君姬姓

也有三女奔密康公公受之而不獻于王王滅

密王崩子躄立

懿王名蕞共王之子在位二十五年○按謚法溫柔賢善曰懿

元年丁亥是時王室既衰詩人作刺王崩弟辟方

立

孝王名辟方懿王之弟在位十五年○按謚法慈惠愛親曰孝

元年壬子自懿王以來德政不脩王室愈微惡來

之後有非子者好馬善養息之王命主於汧渭

之間汧渭二水名馬大蕃息王封為附庸之君邑于

秦使續伯益後是時大雩牛馬死江漢俱凍王

崩子燮立

夷王名燮孝王之子在位十六年

元年丁卯觀禮不明王始下堂而見諸侯荒服不

朝命虢公帥六帥伐大原之戎至于俞泉獲馬

千匹王崩子胡立

胡雙湖曰王始下堂而見諸侯綱常自此紊矣時熊繹五世孫熊渠甚得江漢民和西北伐庸東侵揚粵僭立三子為王長曰康中曰江少曰執庇衛康公七世孫頃公首壞王制并

邶鄘之地斯二者皆陵遲解紐之事何夷王不能問也可為三數息矣

厲王名胡夷王之子在位十七年并共和三十七年

元年癸未榮夷公好利王任之大夫芮良夫諫曰

夫利百物之所生也天地之所載也而或專之

其害多矣王不聽諸侯竟不享。王暴虐無道

國人謗王王怒得衛巫使監謗者以告則殺之

國人莫敢言道路以目以目相盼而已王喜告召公曰

吾能弭謗矣召公曰是障之也以隄防永曰障防民之

口甚於防川川壅而潰傷人必多是故為川者

決之使導為民者宣之使言今王塞下之口而

遂上之過恐為社稷憂王不聽後三年乃相與

畔襲王王出奔於彘不敢歸二相周公召公不

周公旦召公奭相周室者亦號周公召公也以太子靜尚幼乃相與

協和共理國事故稱共和。厲王崩子靜立

丁南湖曰按厲王奔於彘太子靜匿召公家

脫召公與周公乃以其子代太子太子卒得

鳴呼程嬰杵臼以他孩代趙朔孤兒之外而

立孤兒遂為千載義士之最况召公以已子

代太子乎况王長於召公之家而習其訓誨

乎况公之相之戮力經營有如詩之江漢等

篇者乎愚於此嘗論之曰嬰臼外天下事者

召公成天下事者也。夫天下事易成，天下事難。雖然，嬰曰：既能立孤，則亦成事者也。但嬰曰：為一國而召公為天下，其功特有大、小之別耳。

宣王

名靜，厲王之子，在位十六年。

元年

甲戌，召公周公輔王脩政，法文武成康之遺

風。王命召公伐平淮夷，申伯仲山甫順天下，更

失理，喻德教，舉遺士，海內翕然向風，諸侯復宗。

周尹吉甫作詩美之。○王不籍千畝，虢公諫曰：

民之大事在農，故稷為大官。今欲脩先王之緒

而棄其大功，匱神之祀，將何以求福用民？王不

聽。○二十三年，王嘗晏起，姜后脫簪珥待罪於

永巷。永巷，官中道也。使其傅母通言於王曰：王樂色而

忘德，失禮而晏起，亂之興自婢子始。敢請罪，王

於是勤於政事，早朝晏罷，卒成中興之名。○三

十九年，戰於千畝，王師敗績于姜氏之戎。王既

喪南國之師，乃料民。簡料其數。於大原，仲山甫諫不

聽。○四十六年，王將殺其臣杜伯，而非其罪。伯

之友左儒爭之於王，九復之，而王不許。王曰：汝

別君而異友也。儒曰：君道友逆，則順君以誅友。

自古致治之君，非獨德茂亦必有自淑之賢妃。為之助焉，宜有脫簪之后，則有賢妃所以助之者深矣。此其所治，以弼成庭燎之治歟。

友道君逆則順友以違君王怒曰易而言則生
不易則死儒曰士不枉義以從死不易言以求
生臣能明君之過以正杜伯之無罪王殺杜伯
左儒死之。○王崩子官涅立。

幽王

名官涅宣王之子在位十一年

元年

庚申

王無道二年西周三川皆震伯陽父曰

老子字伯陽父音甫

昔伊洛竭而夏亡河竭而商亡今周

德若二代之季矣是歲三川竭岐山崩。○初夏
之衰也褒人之神化為二龍以伺王庭而言曰

余褒之二君也夏后卜殺之而藏其漦

龍所吐沫沫龍

之精氣也傳及殷周莫之發厲王之末發而觀之漦

流于庭化為玄黿入于王府府之童妾遭之而

孕當宣王時生一女懼而棄之時童謠曰靡弧

箕服

山桑曰糜弧弓也箕草名可結以為服服與箠同盛箭者

實亾周國有

夫婦鬻是器者王使執而焚之逃於道見所棄

妖子而取之逸逃於褒至是褒人有獄而入是

女於王是為褒姒王廢愛之。○九年王廢申后

及太子宜臼以褒姒為后以其子伯服為太子

以祖宗數百年之天下而灰燼于婦人之一笑惜哉

為締為裕服之無數周制舊矣褒姒不惟休其蚕織而幽王又裂繒以適其意此姬轍之所以東也

宓曰出奔申褒姒不好笑王說之萬方故不笑王與諸侯約有寇至舉烽火為信則舉兵來援王欲褒姒笑乃無故舉火諸侯悉至至而無寇褒姒大笑褒姒好聞裂繒聲王發繒裂之以適其意○十一年王欲殺故太子宓曰求之於申申侯弗予王伐之申侯與鄩人召西夷犬戎伐王王舉烽火徵兵兵莫至犬戎遂殺王於驪山下盡取周寶賂而去諸侯即申國立故太子宓曰是為平王而西周遂亾

平王

名宜曰幽王之子在位五十年

元年辛未王以豐鎬逼近犬戎不可居乃東遷都

于洛邑自是政由方伯齊楚秦晉漸大齊武王封太公

呂望之國楚成王封黃帝之後熊繹之國秦孝王封伯益之後非子之國晉即成王封唐侯叔

虞之國也○四十八年魯惠公使宰讓請郊廟之禮

於天子王使史角往魯公止之其後在魯於是

有墨翟之學墨子始此魯之用郊始於此矣○四十

九年魯隱公元年也魯周公之後時天子微弱賞罰

不行孔子脩魯史作春秋以正王法始于此王

崩孫琳立

項平菴曰自天理觀之則申侯為平王不共戴天之讐自平王觀之則申侯乃其賈充成濟也其伐之互矣愚亦曰自幽王觀之則平王真所謂亂臣賊子無復人心天理之存者矣夫子刪詩而存揚之水其刺之固互由是論之則春秋托始於平王可以深長思矣

桓王

名琳平王之孫在位二十三年

元年

壬戌

十三年伐鄭鄭與王戰射中王肩

鄭之先宣

王之弟也

王亦能軍鄭人遣使謝勞○王崩子佗立

胡雙湖曰東周之衰決于此鄭伯首惡其能逃萬世之誅乎

莊王

名佗桓王之子在位十三年

元年乙酉十二年齊小白歸國是為桓公○齊人取子糾于魯殺之○桓公自莒反於齊使鮑叔為宰辭曰君加惠於臣使不凍餒則君之賜也若必治國家則非臣之所能也其管夷吾乎臣所不若夷吾者五寬惠柔民弗若也治國家不失其柄弗若也忠信固結於百姓弗若也制禮義可法於四方弗若也執枹鼓立於軍門使百姓加勇焉弗若也桓公曰夫管夷吾射寡人中鉤是以瀆於死鮑叔對曰夫為其君動也君若

宥而反之夫猶是也桓公於是請諸魯施伯曰管子天下之才也所在之國則必得志於天下今彼在齊則必長爲魯憂矣請殺而以其屍授之莊公弗聽使束縛以予齊○初管仲嘗與鮑叔賈分利多自與鮑叔不以為貪知仲貧也嘗謀事窮困鮑叔不以為愚知時不利也三戰三走鮑叔不以為怯知仲有老母也仲曰生我者父母知我者鮑子也○桓公始霸會諸侯盟主問於管仲曰成民之事若何對曰四民者勿使

雜處雜處則其言囂其事易昔聖王之處士也使就間燕處工就官府處商就市井處農就田野令夫士群萃而州處間燕則父與父言義子與子言孝其事君者言敬其幼者言悌少而習焉其心安焉不見異物而遷焉是故其父兄之教不肅而成其子弟之學不勞而能○公曰定民之居若何對曰制國以爲二十一鄉工商之鄉六士鄉十五公帥十一鄉焉國子帥五鄉焉高子帥五鄉焉參國起案以爲三官臣立三宰

工立三族市立三鄉澤立三虞山立三衡。公曰吾何以富國管子對曰唯官山海爲可耳謹鹽筴與鐵官之數其餘輕重準此而行然則舉脣勝事無不服籍者。出管子書。公曰吾欲從事於諸侯爲之若何對曰作內政而寄軍令於是制國五家爲軌軌爲之長十軌爲里里置有司四里爲連連爲之長十連爲鄉鄉有良人焉以爲軍令五家爲軌故五人爲伍軌長帥之十軌爲里故五十人爲小戎里有司帥之四里爲連故

二百人爲卒連長帥之十連爲鄉故二千人爲族鄉良人帥之五鄉一帥故萬人爲一軍五鄉之帥帥之三軍故有中軍之鼓有國子之鼓有高子之鼓春以豸振旅。豸音搜秋以獮治兵是故卒伍整於里軍旅整於郊內教旣成令勿使遷徙伍之人祭祀同福死喪同恤禍災共之人與人相疇家與家相疇世同居少同游故夜戰聲相聞足以不乖晝戰目相視足以相識其歡欣足以相死居同樂行同和死同哀是故守則同

固戰則同疆君有此士也三萬人以方行天下以誅無道以屏周室天下大國之君莫之能禦桓公悅於是專任管仲號曰仲父國事皆令問仲父而管仲得以盡其才故能糾合諸侯不以兵車成霸功者管仲之力也○王崩子胡齊立

劉道源曰管仲之書大抵審輕重法術持度量權衡以籠天下之權致鄰國之弱盡地利以成富強完兵械以臨不服仗王室之威為諸侯之長其術類商鞅其言如韓非其寬厚廣大則過之固非王者之佐矣管仲之德蓋不及其才也

釐王

名胡齊莊王之子在位五年○按釐王綱目作僖王

元年庚子齊桓公會諸侯於北杏遂人不至齊人

滅遂○王崩子閔立

惠王

名闔釐王之子在位二十五

元年乙丑狄人伐衛衛懿公好鶴鶴有乘軒者將戰國人受甲者皆曰使鶴鶴實有祿予何能戰戰于熒澤衛師敗績遂滅衛○初莊王愛少子子頹欲立為太子而不克至是大夫邊伯五人怨惠王召燕衛伐周王出奔溫諸大夫立子頹為王於是鄭伯虢公周同姓也同謀帥師伐周殺子

頹奉惠王歸周，王子虢公酒帛，由是鄭伯始惡王。二十一年，齊桓公伐楚，責其不供王祭。楚子使屈完乞盟於召陵。齊侯以諸侯之師侵蔡，蔡潰，遂伐楚。楚子使問師故，管仲對曰：昔召康公命我先君太公曰：五侯九伯，女實征之，以夾輔周室。爾貢包茅不入，王祭不供，無以縮酒。寡人是徵。昭王南征而不復，寡人是問。對曰：貢之不入，罪也，敢不供給。昭王之不復，君其問諸水濱。師進次于陘，楚子使屈完如師，師退次于

召陵。○王崩，子鄭立。

襄王

名鄭，惠王之子，在位三十三年。

元年，庚午，齊桓公會諸侯於葵丘。王使宰孔致胙於齊桓公，使無下拜。桓公曰：天威不遠，顛咫尺，乃下拜登受。○六年，齊大夫管仲卒，是歲管仲隰朋皆卒。管仲病，桓公問曰：群臣誰可相者？管仲曰：知臣莫如君。公曰：易牙如何？對曰：殺子以適君，非人情，不可。開方如何？對曰：倍親以適君，非人情，難近。豎刁如何？對曰：自宮以適君，非人情。

難親管仲死桓公不用其言近用三子三子專權。八年王以我難告齊齊桓公使諸侯戍周。○初重耳出奔而後反國嘗餒於曹介子推割股以食之及歸賞從亾者狐偃趙衰四人而不及子推子推之從者懸書官門曰有龍矯矯頃失其所五蛇從之周流天下龍饑乏食一蛇割股龍反於淵安其壤土四蛇入穴皆有處所一蛇無穴號于中野公曰噫寡人之過也使入求之不得。○九年桓公卒五公子爭立易牙立無

虧世子昭出。○十四年宋公及楚人戰于泓宋師敗績宋有襄公茲父者欲霸諸侯與楚戰宋人既成列楚人未既濟司馬曰彼衆我寡及其未既濟也請擊之公曰不可君子不困人於厄既濟而未成列又以告公曰未可既成而後擊之宋師敗績公傷股門官殲焉國人皆咎公公曰君子不重傷不禽二毛古之爲軍也不以阻隘寡人雖亾國之餘不鼓不成列世笑以爲宋襄之仁。○晉獻公卒奚齊立晉里克殺其君之

問孔子惜繁縷而與人以邑襄王守隧而與人以田得失何如

子奚齊荀息立奚齊之弟卓里克弒其君卓及其大夫荀息。十六年初，惠王少子叔帶有寵，惠后欲立之，不克。至是，叔帶構狄伐周，王出奔鄭。時晉文公始返國，乃帥諸侯殺叔帶，秦王歸周。二十年，晉文公召王會之河陽踐土，諸侯畢朝。晉文公有大功於王室，請隧於襄王，襄王不許，曰：「王章也，未有代德而有二王，亦叔父之所惡也，不然，叔父有田，而隧又何請焉？」文公於是乎懼而不敢違。○王崩，子壬臣立。

文公外臣也朝受圖而暮設版矣是其所以不同

傾王

名壬臣襄王之子在位六年崩子班立

匡王

名班傾王之子在位六年崩弟瑜立

定王

名瑜匡王之弟在位二十一年

元年，乙卯楚莊始霸，楚本子爵，東遷之後，王室微弱，遂僭稱號王。○二年，楚伐陸渾之戎，觀兵于周郊，王使王孫滿勞之，楚子問鼎之大小輕重，滿對曰：「在德不在鼎，周德雖衰，天命未改，鼎之大小未可問也。」楚子慚而退。

胡雙湖曰：五伯迭興，始于莊王十二年齊桓公入國，至定王之十六年楚莊卒而五伯之

問五伯優劣何

如答五伯莫盛於桓文以其能攘夷尊周室秦穆楚莊次之宋襄不足言矣

綱鑑精義卷之一

業終蓋歷七王九十五年於此矣齊桓晉文功在王室秦穆定晉君至再已而伐晉伐戎以成伯業末乃收其賢臣以從外其不得為諸侯盟主固宜楚莊初滅庸以自豐至窺周而問鼎已而伐鄭伐陳伐宋殆無虛日宋襄智略不如桓文強暴不如秦楚而興師乃不禽二毛不鼓不成列區區以姑息為仁義而不能舒喪師之戚孟之會見辱於楚泓之戰卒殞其軀皆自取也

晉屠岸賈殺趙朔于下官。○趙之先本與秦同姓，祖於蜚廉，有子季勝，其後有造父者，事周穆王，以功封趙城，由是為趙氏。春秋時，有趙夙者，事晉，夙生成子衰，衰生宣子盾，上聲人曰趙衰，冬

日之日也，趙盾，夏日之日也，冬日可愛，夏日可畏，盾生朔，大夫屠岸賈滅朔之族，朔有遺腹子武，賈索之不得，朔客程嬰，公孫杵臼相與謀曰：立孤與死孰難？嬰曰：死易，立孤難耳。杵臼曰：子為其難，杵臼取他兒匿山中，嬰出謬曰：與我千金，吾告趙氏孤處，賈喜，乃使人隨嬰殺杵臼及兒，而趙氏真孤在，嬰與俱匿山中，名曰武。後十五年，武長，嬰具實告，方謀族賈報之。○王崩，子夷立。

簡王

名夷定王之子在位十四年

元年

丙子吳始通於晉

吳秦伯之後先是楚莊王伐陳

陳夏徵舒之母夏姬色甚美莊王欲取之申公

巫臣諫止之楚令尹子反亦欲取之巫臣又諫

止焉夏姬鄭女也巫臣使之歸鄭巫臣奉命聘

晉遂過鄭取之以行子反以為賣已遂族巫臣

之家巫臣怨楚晉楚世為讐敵巫臣請通吳于

晉合力以牽制楚師於是晉侯使巫臣聘吳巫

臣乃教吳車戰使之伐楚楚於是始渡於奔命

○十三年晉悼公立悼公年十四而甚賢明乃

命百官逮鰥寡振廢滯匡困乏救災患禁淫慝

薄賦歛宥罪戾節器用時用民使魏魴魏頡趙

武為卿凡六官之長皆民譽也舉不失職官不

易方爵不踰德族不逼師民無謗言所以能復

霸業○王崩子泄心立

靈王

名泄心簡王之子生而有鬣在位二十七年

元年

庚戌

○三年無終子

無終國名子爵名

嘉父使孟樂

如晉因魏絳請納虎豹之皮以和戎晉悼公曰

我狄無親不如伐之魏絳曰諸侯新服陳鄭來

和將觀於我我德則睦否則攜貳因陳和我有

五利戎狄荐居貴貨易土土可賈焉一也邊鄙不聳民狎其居稽人成功二也戎狄事晉

四鄰振動諸侯咸服三也師徒不勤甲兵不煩四也鑑于后羿而用德度遠至邇安五也晉

侯乃使魏絳盟諸戎後鄭人賂晉以歌鍾罍磬

女樂悼公以其半賜魏絳曰子教寡人和諸戎

狄以正諸華數年之中如樂之和無所不諧請

與子樂之○十一年吳子壽夢卒長子諸樊立

壽夢有四子諸樊餘祭餘昧季札壽夢見札賢欲立之札辭立諸樊○二十一年

孔子生○王崩子貴立

景王名貴靈王之子在位二十五年

元年丁吳使季子聘於魯請觀周樂魯人為奏

六代之樂按六代樂謂雲門黃帝樂也咸池堯樂也大韶舜樂也大夏禹樂也大護

湯樂也大武○二年鄭使公孫僑為政大人之

忠儉者從而與之泰侈者因而斃之從政一年

輿人誦之曰取我衣冠而褚之取我田疇而伍

之孰殺子產吾其與之及三年又誦之曰我有

子弟子產誨之我有田疇子產殖之子產死而

誰其嗣之。○晏嬰一狐裘三十年，豚肩不掩豆，齊國之士待以舉火者七十餘家。○五年，晉侯使韓宣子來聘，觀書於太史氏，見易象魯春秋，曰：周禮盡在魯矣。○七年，鄭作丘賦，子產曰：苟利社稷，死生以之。渾罕曰：君子作法於涼，其敝猶貪，作法於貪，敝將若之何。○九年，鄭人鑄刑書。○十三年，孔子生伯魚，孔子年十九，娶于宋并官氏，一歲而生伯魚，魚之生也，魯昭公以鯉賜孔子，榮君之貺，故因以名曰鯉，而字伯魚。○

鄭大夫公孫僑卒，僑謂子太叔曰：政寬莫如猛，火烈民望而畏之，故鮮死，水懦弱，民狎而翫之，則多死，故寬難。仲尼聞之曰：古之遺愛也。○二十四年，魯顏回生，齊高柴生。○王崩，子丐立，敬王。名丐，景王之子，在位四十四年。

問伍員欲覆楚申包胥欲復楚得失何如
答覆楚者復父之讎子道也復楚者撥國之亂

元年，壬午。○十四年，吳伐楚，入郢，楚昭王出奔于隨，初，伍員與申包胥為友，皆楚人也，伍員父為平王所殺，員奔吳，與包胥別，員曰：我必覆楚，包胥曰：我必復之。伍員既奔吳，遂道伐楚，既入郢，

臣道也但子道
雖盡而忠則有
病何者平王雖
無道吾父之君
也父北面而事
子伐之而鞭其
屍於理乎是覆
楚又不如復楚
之為善也

郟楚遂鞭平王之屍包胥乃如秦乞師依於庭
墻而哭飲食不入口七日秦哀王為之賦無衣
乃為之出師申包胥以秦師至遂敗吳師吳師
乃歸昭王復國。十五年曾參生。孔子出仕
為中都宰制為養生送死之節長幼異食彊弱
異任男女別塗路無拾遺器不彫偽為四寸之
棺五寸之槨丘陵為墳不封不樹行之一年而
四方諸侯則焉定公謂孔子曰學子之法以治
魯國何如孔子對曰雖天下可平何但魯國而

已哉。二十年魯以孔子為大司寇有父子訟
者夫子同狴執之三月不別其父請止夫子赦
之焉季孫聞之不悅曰司寇欺余曩告余曰國
家必先以孝今戮一不孝以教民孝不亦可乎
而又赦何哉冉有以告孔子子喟然歎曰嗚呼
上失其道而殺其下非理也不教以孝而聽其
獄是殺不辜三軍大敗不可斬也獄犴不治不
可刑也何者上教之不行罪不在民故也。孔
子曰吾昔過乎陳之野聞童謠曰楚王渡江得

萍實大如斗，赤如日，剖而食之，甜如蜜。此楚王之應也。孔子觀於魯桓公之廟，有歌器曰：聞宥坐之器，虛則歌，中則正，滿則覆。明君以為至誠，故常置於坐側。顧謂弟子曰：試注水焉。乃注之水中，則正。水至中滿則覆。水滿則器則正夫子喟然歎曰：嗚呼！夫物烏有滿而不覆者哉？子路進曰：敢問持滿有道乎？子曰：聰明睿智，守之以愚，功被天下，守之以讓，勇力振世，守之以怯，富有四海，守之以謙。子路治蒲三年，孔子過之，入其

境，曰：善哉！由也，恭敬而信矣。入其邑，曰：善哉！由也，忠信而寬矣。至其庭，曰：善哉！由也，明察以斷矣。子貢執轡而問曰：夫子未見由之政，而三稱其善，其善可得聞乎？孔子曰：吾見其政矣。入其境，田疇盡易，草萊甚辟，溝洫深治，此其恭敬以信，故其民盡力也。入其邑，墻屋完固，樹木甚茂，此其忠信以寬，故其民不偷也。至其庭，庭甚清閑，諸下用命，此其明察以斷，故其政不擾也。孔子觀於鄉射，喟然嘆曰：吾觀於鄉而知王道。

之易易也。○孔子曰：禮世子之冠，冠於阼階，以著代也。黜於客位，加其有成，三加彌尊，道喻其志。冠而字之，敬其名也。行冠事，必於祖廟，以裸享之。禮將之，以金石之樂節之，所以自卑而尊先祖，示不敢擅也。天子冠者，周公攝政，冠成王而朝于祖，以見諸侯。周公命祝雍作頌曰：令月吉日，王始加元服，去幼志，服袞職，欽若昊命，六合是式，率爾祖考，永永無極，此周公之制也。○孔子相魯，定公與齊侯會于夾谷，孔子曰：有文

事者，必有武備，請具左右司馬以從。去聲既會，齊有司請奏四方之樂，於是旗旄、劔戟、鼓譟而至。孔子趨而進曰：吾兩君為好，去聲和好之會夷狄之樂，何為於此？齊景公心忤，麾之，指麾使退有司請奏官中之樂，優倡侏儒戲而前。孔子趨而進曰：匹夫熒惑諸侯者，罪當誅，請命有司加法焉。首足異處，謂分其處景公懼，歸語其臣曰：魯以君子之道輔其君，而子獨以夷狄之道教寡人，於是齊人乃歸所侵魯郛。音汶陽龜陰之地以謝。

魯○二十二年孔子言於定公曰臣不藏甲大

夫無百雉之城使仲由為季氏宰將墮三都桓

私邑費邠成也謂以彊公室叔孫氏先墮邠音

季氏墮費音秘孟氏之臣處不肯墮成圍之不克

○孔子由大司寇攝行相事七日而誅亂政大

夫少正卯少正姓卯名一說少門人進問曰夫

少正卯魯之聞人也夫子為政而始誅之得無

失乎孔子曰人有惡者五而盜竊不與焉一曰

心逆而險二曰行僻而堅三曰言偽而辯四曰

記醜而博五曰順非而澤此五者有一於人則

不得免於君子之誅而少正卯兼有之故居處

足以聚徒成群言談足以飾邪營眾彊足以反

是獨立此小人之桀雄也不可以不誅也是以

湯誅尹諧文王誅潘王周公誅管叔太公誅華

仕管仲誅付里乙子產誅鄧析央何此七子者

皆異世同心不可不誅也○初魯之販羊有沈

猶氏者常朝飲其羊以詐市人有公慎氏者妻

淫不制有慎潰氏者奢侈踰法魯之鬻六畜者

飾之以儲饋及孔子之為政也則沈猶氏不敢
朝飲其羊公慎氏出其妻慎潰氏越境而徙三
月則鬻牛馬者不儲饋賣羔豚者不加飾男女
行者別其塗道不拾遺男尚忠信女尚貞順其
初人謗曰麇裘而鞞投之無戾鞞之麇裘投之
無郵三月政成行化民之誦曰袞衣章甫實獲
我所章甫袞衣惠我無私

劉恕曰子產從政一年輿人曰孰殺子產吾
其與之三年誦之曰子產而死誰其嗣之孔
子為司寇得政數年攝行相事民謗之三月
而後誦之彼一賢一聖猶得民若此之難後

之為政善惡與于愛憎之口毀
譽出于狡猾之吏非至當論也

居三月魯大治齊人聞之懼乃歸饋音饋女樂於魯

季桓子受之不聽政郊祀天又不致脯音煩○祭
餘肉也

俎於大夫孔子遂去魯○二十三年孟僖子病

不能相禮召其大夫曰禮人之幹也無禮無以

立吾聞將有達者曰孔丘聖人之後也而滅於

宋其祖弗父何以有宋而授厲公及正考父正
謚

考父字孔
父嘉父也佐宋三命滋益恭一命受職再命受
服三命受爵受三

命而愈
加恭敬其鼎銘考父廟鼎而勒銘也云一命而僂

音呂。再命而偃。音區上聲。曲頭。三命而俯。低首近。

命為士其容儂再命為大夫其容偃三命為卿其容俯蓋三者皆是低頭而偃甚於儂俯甚於

偃也所謂循牆而走。牆屏也謂避亦莫予敢侮。

雖過恭而饘於是。於此粥於是。以餽予口。稠曰

中以餽我口儉之至也其共也。如是臧孫紇有

言曰：聖人有明德者，若不當世，其後必有達人。

今其將在孔丘乎？我獲沒，嗣子必師事之，以定

其位。故懿子與南宮敬叔師事仲尼。○老子者

楚苦縣人也。苦音戶按全書李姓。葛洪傳云李

母姓名耳，字伯陽。又曰聃。音為周守藏史。黃平

曰守藏孔子與敬叔至周，問禮於老聃。老子告

之曰：良賈深藏若虛，君子盛德容貌若愚。孔子

去，謂弟子曰：鳥吾知其能飛，魚吾知其能游，獸

吾知其能走，走者可以為網，游者可以為綸，飛

者可以為矰。至於龍，吾不能知其乘風雲而上

聲，天也。今見老子，其猶龍乎？朱子曰：孔子問禮

嘗為周柱下史，故問之。○二十四年，越敗吳於

檇李，吳闔廬卒。子夫差嗣，夫差使人立於庭，荀

出入必謂已曰夫差而忘越王之殺而父乎則

對曰唯不敢忘三年乃報越○衛世子蒯瞶出

奔宋○二十五年魯定公卒子將嗣是為哀公○孔

子過曹適宋與弟子習禮大樹下桓魋宋司馬向魋也

出於桓公故又稱桓氏魋伐拔其樹有天生德之語適鄭鄭人曰東

門有人其頽似堯其項類臯陶其肩類子產其

要以下不及禹三寸纍纍然若喪家之狗言人臣失

位去國喪敗如狗失主無所依歸故纍纍然而低垂也適陳主司城又適

衛有三年有成之語將西見趙簡子至河聞竇鳴犢舜

華二子晉賢大夫也孔子曰趙氏未得志之時

用此兩人而後從政今得志乃殺之君子惡

傷其類故臨河而嘆曰云云殺於臨河嘆曰美哉水洋洋乎

丘之不濟此命也反于衛又主蘧伯玉家靈適

陳有絕糧之事○二十六年吳夫差伐越越夏少康

於會稽以奉禹祀號曰越今為紹興府敗越於夫椒山名遂入越越

子句踐既敗以甲楯五千棲于會稽使大夫種

行成於吳夫差將許之伍員諫曰不可臣聞之

樹德莫如滋去疾莫如盡昔夏少康有田一成

有衆一旅能布其德而兆其謀遂滅過戈復禹

殺賢戮士簡子非可見之君孔子至河而反是見機而作之神也

之績今吳不如過而越大於少康或將豐之不
 亦難乎句踐能親而務施施不失人親不棄勞
 與我同壤而世為仇敵於是克而弗取將又存
 之違天而長寇讎後雖悔之不可及已及左姬
 之衰也日可俟也介在蠻夷而長寇讎以是求
 伯必不行矣弗聽退而告人曰越十年生聚而
 十年教訓二十年之外吳其為沼乎。二十七
 年衛靈公薨蒯瞶之子輒立是為蒯瞶入自國
 是為輒拒之子路與其難去聲。時子路太子
 莊公

之臣石乞以戈擊子路斷纓冠系之子路曰君

子死冠不免結纓而死衛人醢子路孔子聞之

命覆醢蓋痛子路之禍而不忍食其似也。朱

子路即是見不到非知其非義而苟為之也。○三十一年吳伐陳○

孔子通蔡如葉反于蔡有沮溺耦耕丈楚使聘

之陳蔡大夫謀曰孔子用於楚則陳蔡危矣相

與發徒圍之於野孔子曰詩云匪兕兕牛一角

斤匪虎率彼曠野吾道非邪吾何為於此子貢

曰夫子道至大天下莫能容顏回曰不容何病

然後見君子楚昭王興師迎之乃得至楚將封以書社地七百里今尹子西曰王之使諸侯有
如子貢者乎曰無有王之輔相有如顏回者乎
曰無有王之將卒有如子路者乎曰無有王之
官尹有如宰予者乎曰無有且楚之祖封於周
號為子男五十里今孔丘述三王之法明周召
之業王若用之則楚安得世世堂堂方數千里
乎夫文王在豐武王在鎬百里之君卒王天下
今孔丘得據土壤賢弟子為佐非楚之福也昭

王乃止。○三十六年孔子自衛反魯季康子迎
歸魯哀公問政有舉直民終不能用乃序書上
自唐虞堯典舜典下至秦繆繆與穆同刪古詩三千
為三百五篇詩三百十一篇云三百五篇者蓋以笙詩六篇無辭有辭者實三百
五皆絃歌之禮樂自此可述晚而喜讀易韋編
三絕韋熟皮也編貫也序彖象繫辭說卦文言。○三十
九年魯人西狩獲麟西狩大野叔孫氏之車子
鉏商獲麟見其膚而角以為不祥以賜虞人仲
尼觀之曰麟也有王者則至無王者則不至孰

為來哉孰為來哉反袂拭面涕沾袍曰吾道窮

矣。孔子因魯史記作春秋自隱至哀十二公

隱公桓公莊公閔公僖公文公絕筆於獲麟春秋

宣公成公襄公昭公定公哀公經止於西狩獲麟一句麟筆則筆可者筆削

則削不可則游夏子游子夏之徒不能贊一辭贊助

弟子三千人身通六藝者六藝禮樂射御書數七十有二

人。四十年、熒惑守心心宋之分野也景公憂

之司星子韋曰可移於相公曰相吾之股肱曰

可移於民公曰君者待民曰可移於歲公曰歲

饑民困吾誰為君子韋曰天高聽卑君有君人

之言三熒惑豈有動於是候之果徙三度。夏

四月己丑孔子卒於魯時年七十三歲孔子蚤作負手

曳杖消搖於門歌曰泰山其頽乎梁木其壞乎

哲人其萎乎既歌而入當戶而坐子貢聞之曰

泰山其頽則吾將安仰梁木其壞哲人其萎則

吾將安放夫子殆將病也遂趨而入夫子曰賜

爾來何遲也夏后氏殯於東階之上則猶在阼

也殷人殯於兩楹之間夫明王不興而天下其

孰能宗子、子殆將死也、蓋寢疾七日而沒、公誄之曰、昊天不弔、不憇遺一老、俾屏余一人、以在位、鞅鞅余在疚、嗚呼哀哉、尼父無自律、子贛曰、君其不沒於魯乎、夫子之言曰、禮失則昏、名失則愆、失志為昏、失所為愆、生不能用、死而誅之、非禮也、稱一人、非名也、君兩失之、葬魯城北泗上、○王崩、子仁立、

元王 名仁、敬王之子在位六年

元年、丙寅○三年、越伐吳、滅之、初、越句踐自行成

及國、乃勞心焦思、臥薪嘗膽、折節下賢、厚遇賓客、賑貧弔死、與百姓同其勞苦、二十餘年、其民生長可用、乃以伐吳、吳王兵敗、亦使人行成、請曰、孤臣異日得罪於會稽、孤臣不敢逆命、得與君王成以歸、今君王誅孤臣、孤臣亦欲如會稽之赦罪、句踐不忍、欲許之、范蠡曰、會稽之事、天以越賜吳、吳不取、今天以吳賜越、越豈可逆天乎、且君王早朝晏罷、非為吳耶、謀之二十年、一旦棄之、可乎、且天與不取、反受其咎、吳王乃自

殺句踐既敗吳乃以北兵渡淮水名與齊晉諸侯會于徐州致貢于周王乃使人賜胙命為伯諸侯畢賀○范蠡去越越伯殺其大夫文種初蠡與種書曰越王為人長頸烏喙可與共患難不可共安樂子何不去種稱疾不朝或讒種作亂賜劍死蠡與私從裝輕寶珠玉乘舟江湖浮海出齊變姓名自謂鴟夷子皮父子治產至數千萬齊人聞其賢以為相蠡喟然曰居家致千金居官致卿相此布衣之極也久受尊名不祥乃

歸相印盡散其財懷重寶間行止于陶自謂陶朱公貨累鉅萬魯人猗頓往問術蠡曰畜五牝乃大畜牛羊十年間貨擬王公故天下言富者稱陶朱猗頓○王崩子介立

貞定王 名介元王之子在位二十八年

元年壬申○十一年初晉有智氏趙氏韓氏魏氏范氏中行氏號為六卿六卿強晉侯卑弱不能制是歲智伯與韓趙魏共滅范氏中行氏而分其地○十三年趙與韓魏共分智伯之地○陳

公子完奔齊齊桓公使為工正更姓田子孫盛
多其後齊亂公室卑弱權歸田氏田氏好施以
家量_大貸於民而以公量_小收之民皆戴之國
內多篡弒立君皆由田氏田恒弒齊簡公襄子
為齊相至是與三晉通使盡以其兄弟宗人為
都邑大夫。○王崩子嵬立。

考王

名嵬貞定王之
子在位十六年


元年_庚是歲晉幽公立止有絳曲沃二邑餘皆
入於韓趙魏。○王封其弟於河南是為相公歷

威公至惠公長子武公為西周公少子封於鞏
號東周惠公。○王崩子午立。

綱鑑精采卷之一終

186
20
24

新編新牙卷之二



186
20
24

東 京 圖 書 館

二 〇	五 〇	一 七	正 史	漢 書 門
冊	號	架	函	類

綱鑑精采

003026-001-2

186-24

綱鑑精采

葉向 高進 / 編
坂田 丈平 / 校

M10-11

ACC-0350

